

四庫全書

史部

欽定四庫全書

史部

史記正義卷八十六至八十九

詳校官編修臣李如筠

欽定四庫全書

史記正義卷八十六

唐 張守節 撰

刺客列傳第二十六

史記八十六

曹沫者魯人也以勇力事魯莊公莊公好力曹沫為魯

將與齊戰三敗北魯莊公懼乃獻遂邑之地以和

故城在充

州龍邱縣西北  
七十里也

猶復以為將齊桓公許與魯會于柯而

盟桓公與莊公既盟於壇上曹沫執匕首刳齊桓公桓

公左右莫敢動而問曰子將何欲曹沫曰齊彊魯弱而大國侵魯亦以甚矣今魯城壞即歷齊境君其圖之桓公乃許盡歸魯之侵地既已言曹沫投其匕首下壇北面就羣臣之位顏色不變辭令如故桓公怒欲倍其約管仲曰不可夫貪小利以自快棄信於諸侯失天下之援不如與之於是桓公乃遂割魯侵地曹沫三戰所亡地盡復予魯其後百六十有七年而吳有專諸之事專諸者吳堂邑人也伍子胥之亡楚而如吳也知專諸

之能伍子胥既見吳王僚說以伐楚之利吳公子光曰  
彼伍員父兄皆死於楚而員言伐楚欲自為報私讐也  
非能為吳吳王乃止伍子胥知公子光之欲殺吳王僚  
乃曰彼光將有內志未可說以外事乃進專諸於公子  
光光之父曰吳王諸樊諸樊弟三人次曰餘祭次曰夷  
昧次曰季子札諸樊知季子札賢而不立太子以次傳  
三弟欲卒致國于季子札諸樊既死傳餘祭餘祭死傳  
夷昧夷昧死當傳季子札季子札逃不肯立吳人乃立

夷昧之子僚為王公子光曰使以兄弟次邪季子當立必以子乎則光真適嗣當立故嘗陰養謀臣以求立光既得專諸善客待之九年而楚平王死春吳王僚欲因楚

喪使其二弟公子蓋餘屬庸將兵圍楚之潛

潛故城在壽州霍山

縣東二百步

使延陵季子於晉以觀諸侯之變楚發兵絕吳

將蓋餘屬庸路吳兵不得還於是公子光謂專諸曰此時不可失不求何獲且光真王嗣當立季子雖來不吾廢也專諸曰王僚可殺也母老子弱而兩弟將兵伐楚

楚絕其後方今吳外困於楚而內空無骨鯁之臣是無如  
我何公子光頓首曰光之身子之身也四月丙子光伏  
甲士於窟室中而具酒請王僚王僚使兵陳自宮至光  
之家門戶階陛左右皆王僚之親戚也夾立侍皆持長  
鉞酒既酣公子光詳為足疾入窟室中使專諸置匕首  
魚炙之腹中炙者夜反而進之既至王前專諸擘魚因以匕  
首刺王僚王僚立死左右亦殺專諸王人擾亂公子光  
出其伏甲以攻王僚之徒盡滅之遂自立為王是為闔

閭閻閭乃封專諸之子以為上卿其後七十餘年而晉有  
豫讓之事

豫讓者晉人也故嘗事范中行氏而無所知名去而事  
智伯智伯甚尊寵之及智伯伐趙襄子趙襄子與韓魏  
合謀滅智伯滅智伯之後而三分其地趙襄子最怨智  
伯漆其頭以為飲器

劉云酒器也每賓會設之示  
恨深也按諸先儒說恐非

豫讓

遁山中曰嗟乎士為知己者死女為說己者容今智  
伯知我我必為報讐而死以報智伯則吾魂魄不愧矣



乃變名姓為刑人入宮塗廁中挾匕首欲以刺襄子襄子如廁心動執問塗廁之刑人則豫讓內持刀兵曰欲為智伯報仇左右欲誅之襄子曰彼義人也吾謹避之耳且智伯亡無後而其臣欲為報仇此天下之賢人也卒釋去之居頃之豫讓又漆身為厲吞炭為啞使形狀不可知行乞於市其妻不識也行見其友其友識之曰汝非豫讓邪曰我是也其友為泣曰以子之才委質而臣事襄子襄子必近幸子近幸子乃為所欲顧不易邪

何乃殘身苦形欲以求報襄子不亦難乎豫讓曰既已  
委質臣事人而求殺之是懷二心以事其君也且吾所  
為者極難耳然所以為此者將以愧天下後世之為人臣  
懷二心以事其君者也既去頃之襄子當出豫讓伏於  
所當過之橋下

汾橋下架水在并  
州晉陽縣東一里

襄子至橋馬驚襄子

曰此必是豫讓也使人問之果豫讓也於是襄子乃數  
豫讓曰子不嘗事范中行氏乎智伯盡滅之而子不為  
報仇而反委質臣於智伯智伯亦已死矣而子獨何以

為之報讐之深也豫讓曰臣事范中行氏范中行氏皆  
衆人遇我我故衆人報之至於智伯國士遇我我故國  
士報之襄子喟然嘆息而泣曰嗟乎豫子子之為智伯  
名既成矣而寡人赦子亦已足矣子其自為計寡人不  
復釋子使兵圍之豫讓曰臣聞明主不掩人之美而忠  
臣有死名之義前君已寬赦臣天下莫不稱君之賢今  
日之事臣固伏誅然願請君之衣而擊之焉以致報讐  
之意則雖死不恨非所敢望也故布腹心於是襄子大

義之乃使使持衣與豫讓豫讓拔劍三躍而擊之曰吾  
可以下報智伯矣遂伏劍自殺死之日趙國志士聞之皆  
為涕泣其後四十餘年而軹有聶政之事

聶政者軹深井里人也

在懷州濟源縣南三十里

殺人避仇與母姊

如齊以屠為事久之濮陽嚴仲子事韓哀侯與韓相俠  
累有郤嚴仲子恐誅亡去游求人可以報俠累者至齊  
齊人或言聶政勇敢士也避仇隱於屠者之間嚴仲子  
至門請數反然後具酒自觴

數色吏反

聶政母前酒酣嚴仲

子奉黃金百溢前為聶政母壽聶政驚怪其厚固謝嚴  
仲子嚴仲子固進而聶政謝曰臣幸有老母家貧客游  
以為狗屠可以旦夕得甘毳以養親親供養備不敢當  
仲子之賜嚴仲子辟人因為聶政言曰臣有仇而行游  
諸侯衆矣然至齊竊聞足下義甚高故進百金者將用  
為夫人麤糲之費

糲酒麤米也脫粟也韋昭云古者名男子為丈夫尊大嫗為夫人漢書宣

元王傳王過夫人益誦為夫人乞骸去按夫人憲得以外祖母古詩云三日斷五疋夫人故言遲是

交足下之驩豈敢以有求望邪聶政曰臣所以降志辱

身居市井屠者徒幸以養老母老母在政身未敢以許人也嚴仲子固讓聶政竟不肯受也然嚴仲子卒備賓主之禮而去久之聶政母死既已葬除服聶政曰嗟乎政乃市井之人

古者相聚汲水有物便賣因成市故云市井

鼓刀以屠而嚴

仲子乃諸侯之卿相也不遠千里枉車騎而交臣臣之所以待之至淺鮮矣未有大功可以稱者而嚴仲子奉百金為親壽我雖不受然是者徒深知政也夫賢者以感怨睚眦之意而親信窮僻之人而政獨安得嘿然而

已乎且前日要政政徒以老母老母今以天年終政將  
為知己者用乃遂西至濮陽見嚴仲子曰前日所以不  
許仲子者徒以親在今不幸而母以天年終仲子所欲  
報仇者為誰請得從事焉嚴仲子具告曰臣之仇韓相  
俠累俠累又韓君之季父也宗族盛多居處兵衛甚設  
臣欲使人刺之衆終莫能就今足下幸而不棄請益其  
車騎壯士可為足下輔翼者聶政曰韓之與衛相去中  
間不甚遠今殺人之相相又國君之親此其勢不可以多

人多不能無生得失生得失則語泄語泄是韓舉國而與仲子為讐豈不殆哉遂謝車騎人徒聶政乃辭獨行杖劍至韓韓相俠累方坐府上持兵戟而衛侍者甚衆聶政直入上階刺殺俠累左右大亂聶政大呼所擊殺者數十人因自皮面決眼自屠出腸遂以死韓取聶政屍暴於市

暴滿酷反

購問莫知誰子於是韓購縣之有能

言殺相俠累者予千金久之莫知也政姊榮聞人有刺殺韓相者賊不得國不知其名姓暴其尸而縣之千金



乃於邑曰其是吾弟與嗟乎嚴仲子知吾弟立起如韓之市而死者果政也伏尸哭極哀曰是軹深井里所謂聶政者也市行者諸衆人皆曰此人暴虐吾國相王縣購其名姓千金夫人不聞與何敢來識之也榮應之曰聞之然政所以蒙汚辱自棄於市販之間者為老母幸無恙妾未嫁也親既以天年下世妾已嫁夫嚴仲子乃察舉吾弟因汚之中而交之澤厚矣可奈何士固為知己者死今乃

以妾尚在之故重自刑以絕從

重直龍反自刑作刊說文云刊別也

按重猶憂惜也本為嚴仲子報仇訖憂惜其事不令漏泄以絕其蹤迹其姊亡云云為已隱誤矣

妾其奈何畏歿身之誅終滅賢弟之名大驚韓市人乃大呼天者三卒於邑悲哀而死政之旁晉楚齊衛聞之皆曰非獨政能也及其姊亦烈女也鄉使政誠知其姊無濡忍之志不重暴骸之難必絕險千里以列其名姊弟俱僇於韓市者亦未必敢以身許嚴仲子也嚴仲子亦可謂知人能得士

矣其後二百二十餘年秦有荆軻之事

按年表從始皇二十三年至韓

景侯三百七十年若至哀侯六年六百四十三年

荆軻者衛人也其先乃齊人徙於衛衛人謂之慶卿而之燕燕人謂之荆卿荆卿好讀書擊劍以術說衛元君衛元君不用其後秦伐魏置東郡徙衛元君之支屬於

野王

懷州河內縣

荆軻嘗游過榆次

并州縣也

與蓋聶論劍蓋聶

怒而目之荆軻出人或言復召荆卿蓋聶曰曩者吾與論劍有不稱者吾目之試往是宜去不敢留使使往之

主人荆卿則已駕而去榆次矣使者還報蓋聶曰固去

也吾曩者目攝之

攝猶視也

荆軻游於邯鄲魯句踐與荆軻

博爭道魯句踐怒而叱之荆軻嘿而逃去遂不復會荆

軻既至燕愛燕之狗屠及善擊筑者高漸離

音子廉反

荆軻嗜

酒日與狗屠及高漸離飲於燕市酒酣以往高漸離擊

筑荆軻和而歌於市中相樂也已而相泣旁若無人者

荆軻雖游於酒人乎然其為人沈深好書其所游諸侯

盡與其賢豪長者相結其之燕燕之處士田光先生亦

善待之知其非庸人也居頃之會燕太子丹質秦亡歸  
燕燕太子丹者故嘗質於趙而秦王政生於趙其少時  
與丹驩及政立為秦王而丹質於秦秦王之遇燕太子  
丹不善故丹怨而亡歸歸而求為報秦王者國小力不  
能其後秦日出兵山東以伐齊楚三晉稍蠶食諸侯且  
至於燕燕君臣皆恐禍之至太子丹患之問其傅鞠武  
武對曰秦地徧天下威脅韓魏趙氏北有甘泉谷口之  
固南有涇渭之沃擅巴漢之饒右隴蜀之山左闕駁之

險民衆而士厲兵革有餘意有所出則長城之南易水

以北

以北謂燕國也

未有所定也奈何以見陵之怨欲批其逆

鱗哉丹曰然則何由對曰請入圖之居有間秦將樊於期得罪於秦王亡之燕太子受而舍之鞠武諫曰不可夫以秦王之暴而積怒於燕足為寒心又況聞樊將軍之所在乎是謂委肉當餓虎之蹊也禍必不振矣雖有管晏不能為之謀也願太子疾遣樊將軍入匈奴以滅口請西約三晉南連齊楚北購於單于其後廼可圖也太子

曰太傅之計曠日彌久心惛然

惛音昏

恐不能須臾且非

獨於此也夫樊將軍窮困於天下歸身於丹丹終不以  
迫於彊秦而棄所哀憐之交置之匈奴是固丹命卒之  
時也願太傅更慮之蒯武曰夫行危欲求安造禍而求  
福計淺而怨深連結一人之後交不顧國家之大害此  
謂資怨而助禍矣夫以鴻毛燎於爐炭之上必無事矣  
且以鵬鷺之秦行怨暴之怒豈足道哉燕有田光先生  
其為人智深而勇沈可與謀太子曰願因太傅而得交

於田先生可乎鞠武曰敬諾出見田先生道太子願圖  
國事於先生也田光曰敬奉教乃造焉太子逢迎却行  
為導跪而蔽席田光坐定左右無人太子避席而請曰  
燕秦不兩立願先生留意也田光曰臣聞騏驎盛壯之  
時一日而馳千里至其衰老駕馬先之今太子聞光盛  
壯之時不知臣精已消亡矣雖然光不敢以圖國事所  
善荊卿可使也

燕丹子云田光答曰竊觀太子客無可  
用者夏扶血勇之人怒而面赤宋意脉

勇之人怒而面青武陽骨勇之人怒而面  
白光所知荊軻神勇之人怒而色不變

太子曰願因



先生得結交於荊卿可乎田光曰敬諾即起趨出太子

送至門戒曰丹所報先生所言者國之大事也願先生

勿泄也田光俛而笑曰諾

俛音俯

偻行見荊卿曰光與子

相善燕國莫不知今太子聞光壯盛之時不知吾形已

不逮也幸而教之曰燕秦不兩立願先生留意也光竊

不自外言足下於太子也願足下過太子於宮荊軻曰

謹奉教田光曰吾聞之長者為行不使人疑之今太子

告光曰所言者國之大事也願先生勿泄是太子疑光

也夫為行而使人疑之非節俠也欲自殺以激荆卿曰  
願足下急過太子言光已死明不言也因遂自刎而死  
荆軻遂見太子言田光已死致光之言太子再拜而跪  
膝行流涕有頃而後言曰丹所以誠田先生毋言者欲  
以成大事之謀也今田先生以死明不言豈丹之心哉  
荆軻坐定太子避席頓首曰田先生不知丹之不肖使  
得至前敢有所道此天之所以哀燕而不棄其孤也今  
秦有貪利之心而欲不可足也非盡天下之地臣海內

之王者其意不厭今秦已虜韓王盡納其地又舉兵南伐楚北臨趙王翦將數十萬之衆距漳鄴而李信出太原雲中趙不能支秦必入臣入臣則禍至燕燕小弱數困於兵今計舉國不足以當秦諸侯服秦莫敢合從丹之私計愚以為誠得天下之勇士使於秦闕以重利秦王貪其勢必得所願矣誠得刳秦王使悉反諸侯侵地若曹沫之與齊桓公則大善矣則不可因而刺殺之彼秦大將擅兵於外而內有亂則君臣相疑以其間諸侯

得合從其破秦必矣此丹之上願而不知所委命唯荆卿留意焉久之荆軻曰此國之大事也臣駕下恐不足任使太子前頓首固請毋讓然後許諾於是尊荆卿為上卿舍上舍太子日造門下供大牢具異物閒進車騎美女恣荆軻所欲以順適其意久之荆軻未有行意秦將王翦破趙虜趙王盡收入其地進兵北略地至燕南界太子丹恐懼乃請荆軻曰秦兵旦暮渡易水則雖欲長待足下豈可得哉荆軻曰微太子言臣願謁之今行而

母信則秦未可親也夫樊將軍秦王購之金千斤邑萬

家誠得樊將軍首與燕督亢之地圖

督亢坡在幽州范陽縣東南十里今

固安縣南有督亢幽州南界

奉獻秦王秦王必說見臣臣乃得有以

報太子曰樊將軍窮困來歸丹丹不忍以已之私而傷

長者之意願足下更慮之荆軻知太子不忍乃遂私見

樊於期曰秦之逼將軍可謂深矣父母宗族皆為戮沒

今聞購將軍首金千斤邑萬家將奈何於期仰天太息

流涕曰於期每念之常痛於骨髓顧計不知所出耳荆

軻曰今有一言可以解燕國之患報將軍之仇者何如  
於期乃前曰為之奈何荊軻曰願得將軍之首以獻秦  
王秦王必喜而見臣臣左手把其袖右手搥其匈然則  
將軍之仇報而燕見陵之愧除矣將軍豈有意乎樊於  
期偏袒搥腕而進曰此臣之日夜切齒腐心也乃今得  
聞教遂自刎太子聞之馳往伏屍而哭極哀既已不可  
奈何乃遂盛樊於期首函封之於是太子豫求天下之  
利匕首得趙人徐夫人匕首取之百金使工以藥焠之

以試人血濡縷人無不立死者乃裝為遣荆卿燕國有  
勇士秦舞陽年十三殺人人不敢忤視乃令秦舞陽為  
副荆軻有所待欲與俱其人居遠未來而為治行頃之  
未發太子遲之疑其改悔乃復請曰日已盡矣荆卿豈  
有意哉丹請得先遣秦舞陽荆軻怒叱太子曰何太子  
之遣往而不反者豎子也且提一匕首入不測之彊秦  
僕所以留者待吾客與俱今太子遲之請辭決矣遂發  
太子及賓客知其事者皆白衣冠以送之至易水之上

既祖取道

易州在幽州  
歸義縣界

高漸離擊筑荆軻和而歌為變

徵之聲

徵知  
雄反

士皆垂淚涕泣又前而歌曰風蕭蕭兮易

水寒壯士一去兮不復還復為羽聲忼慨士皆瞋目髮

盡上指冠於是荆軻就車而去終已不顧遂至秦持干

金之資幣物厚遺秦王寵臣中庶子蒙嘉嘉為先言於

秦王曰燕王誠振怖大王之威不敢舉兵以逆軍吏願

舉國為內臣比諸侯之列給貢職如郡縣而得奉守先

王之宗廟恐懼不敢自陳謹斬樊於期之頭及獻燕督



亢之地圖函封燕王拜送于庭使使以聞大王唯大王

命之秦王聞之大喜乃朝服設九賓

劉云設文物大備即謂九賓不得以

周禮九賓

見燕使者咸陽宮

三輔皇圖云秦始皇都咸陽因此陵營宮殿則

義為釋

紫宮象帝宮渭水貫都以象

天漢橋南度以法牽牛也

荆軻奉樊於期頭函而秦

舞陽奉地圖匣以次進至陞秦舞陽色變振恐羣臣怪之荆軻

顧笑舞陽前謝曰北蕃蠻夷之鄙人未嘗見天子故振懼願大

王少假借之使得畢使於前秦王謂軻曰取舞陽所持地圖軻

既取圖奏之秦王發圖圖窮而匕首見因左手把秦王之袖而右

手持匕首搥之未至身秦王驚自引而起袖絕拔劍劍長操

其室

燕太子云左手搥其脅秦王曰今日之事從子計耳乞聽瑟而死召姬人鼓琴琴聲曰羅縠單衣可

裂而絕八尺屏風可超而越鹿盧之劍可負而拔王於是奮袖超屏風走之

時惶急劍堅故

不可立拔荆軻逐秦王秦王環柱而走羣臣皆愕卒起

不意盡失其度而秦法羣臣侍殿上者不得持尺寸之

兵諸郎中執兵皆陳殿下非有詔召不得上方急時不

及召下兵以故荆軻乃逐秦王而卒惶急無以擊軻而

以手共搏之是時侍醫夏無且以其所奉藥囊提荆軻

也

提姪  
帝反

秦王方環柱走卒惶急不知所為左右乃曰王

負劍負劍遂拔以擊荆軻斷其左股荆軻廢乃引其匕

首以擲秦王不中中桐柱

燕丹太子云荆軻拔匕首  
擲秦王決耳入桐柱火出

秦

王復擊軻軻被八創軻自知事不就倚柱而笑箕踞以罵

曰事所以不成者以欲生劫之必得約契以報太子也

於是左右既前殺軻秦王不怡者良久已而論功賞羣

臣及當坐者各有差而賜夏無且黃金二百溢曰無且

愛我乃以藥囊提荆軻也於是秦王大怒益發兵詣趙

詔王剪軍以伐燕十月而拔薊城燕王喜太子丹等盡  
率其精兵東保於遼東秦將李信追擊燕王急代王嘉  
乃遺燕王喜書曰秦所以尤追燕急者以太子丹故也  
今王誠殺丹獻之秦王秦王必解而社稷幸得血食其  
後李信追丹丹匿衍水中燕王乃使使斬太子丹欲獻  
之秦秦復進兵攻之後五年秦卒滅燕虜燕王喜其明  
年秦并天下立號為皇帝於是秦逐太子丹荆軻之客  
皆亡高漸離變名姓為人庸保匿作於宋子

宋子故城  
在提州平

賴縣北  
三十里

久之作苦聞其家堂上客擊筑傍徨不能去每  
出言曰彼有善有不善從者以告其主曰彼庸乃知音  
竊言是非家人召使前擊筑一坐稱善賜酒而高漸  
離念久隱畏約無窮時乃退出具裝匣中筑與其善衣  
更容貌而前舉坐客皆驚下與抗禮以為上客使擊筑  
而歌客無不流涕而去者宋子傳客之聞於秦始皇秦  
始皇召見人有識者乃曰高漸離也秦皇帝惜其善擊  
筑重赦之乃矐其目使擊筑未嘗不稱善稍益近之高

漸離乃以鉛置筑中復進得近舉筑撲秦皇帝不中於  
是遂誅高漸離終身不復近諸侯之人魯勾踐已聞荆  
軻之刺秦王私曰嗟乎惜哉其不講於刺劍之術也甚  
矣吾不知人也曩者吾叱之彼乃以我為非人也

太史公曰世言荆軻其稱太子丹之命天雨粟馬生角  
也太過又言荆軻傷秦王皆非也始公孫季功董生與  
夏無且游具知其事為余道之如是自曹沫至荆軻五  
人此其義或成或不成然其立意較然不欺其志名垂

後世豈妄也哉

史記正義卷八十六



欽定四庫全書

史記正義卷八十七

唐 張守節 撰

李斯列傳第二十七

史記八十七

李斯者楚上蔡人也年少時為郡小吏見吏舍廁中鼠  
食不潔近人犬數驚恐之斯入倉觀倉中鼠食積粟居  
大廡之下不見人犬之憂於是李斯乃歎曰人之賢不  
肖譬如鼠矣在所自處耳乃從荀卿學帝王之術學已

成度楚王不足事而六國皆弱無可為建功者欲西入秦辭於荀卿曰斯聞得時無怠今萬乘方爭時游者主事今秦王欲吞天下稱帝而治此布衣馳騫之時而游說者之秋也

言秋時萬物成熟今爭彊時亦說士成熟時

處卑賤之位而計

不為者此禽鹿視肉人面而能彊行者耳故詬莫大於卑賤

呼后反恥辱也

而悲莫甚於窮困久處卑賤之位困苦之

地非世而惡利

言譏世富貴惡其榮利自託於無為者非士人之情實力不能致此也

自

託於無為此非士之情也故斯將西說秦王矣王秦會

莊襄王卒李斯乃求為秦相文信侯呂不韋舍人不韋

賢之任以為郎李斯因以得說說秦王曰胥人者去其

幾也

胥相也幾謂察也言閔東六國與秦相敵者君臣機密並有瑕釁可成大功而遂忍之

成大

功者在因瑕釁而遂忍之昔者秦穆公之霸終不東并

六國者何也諸侯尚衆周德未衰故五伯迭興更尊周

室自秦孝公以來周室卑微諸侯相兼闢東為六國秦

之乘勝役諸侯蓋六世矣

秦孝公惠王文武王昭王孝文王莊襄王

今諸侯

服秦譬若郡縣夫以秦之彊大王之賢由竈上騷除足

以滅諸侯成帝業為天下一統此萬世之一時也今急而不急就諸侯復彊相聚約從雖有黃帝之賢不能并也秦王乃拜斯為長史聽其計陰遣謀士齎持金玉以游說諸侯諸侯名士可下以財者厚遺結之不肯者利劍刺之離其君臣之計秦王乃使其良將隨其後秦王拜斯為客卿會韓人鄭國來間秦以作注溉渠

鄭國渠首起雍

州雲陽縣西南二十五里自山鄠郿口為渠傍北山東注洛三百餘里以溉田又曰韓苦秦兵而使水工鄭國間秦作注溉渠令費人工不東伐也

已而覺秦宗室大臣皆言秦王曰諸

侯人來事秦者大抵為其主游間於秦耳請一切逐客

李斯議亦在逐中斯乃上書曰

始皇十年

臣聞吏議逐客

竊以為過矣昔繆公求士西取由余於戎東得百里奚

於宛

新序云百里奚楚宛人仕於虞虞亡人秦號五羖大夫也

迎蹇叔於宋

括地志云蹇叔

岐州人也時避

宋故迎之於宋

求丕豹公孫支於晉

括地志云公孫支岐州人避晉後歸

秦

此五者不產於秦而繆公用之并國二十遂霸西戎

孝公用商鞅之法移風易俗民以殷盛國以富彊百姓

樂用諸侯親服獲楚魏之師舉地千里至今治彊惠王

用張儀之計拔三川之地西并巴蜀北收上郡

惠王十一年魏納

上郡十五縣

南取漢中

惠王十三年攻楚漢中取地六百里

包九夷制鄢郢

謂夷

并巴蜀收上郡取漢中伐義渠丹犂是也九夷本東夷九種此言者文體然也

東據成臯之險

河南府汭水縣也

割膏腴之壤遂散六國之從使之西面事秦

功施到今昭王得范雎廢穰侯逐華陽彊公室杜私門蠶食諸侯使秦成帝業此四君者皆以客之功由此觀之客何負於秦哉向使四君却客而不內疏士而不用是使國無富利之實而秦無彊大之名也今陛下致昆

山之玉

昆岡在于開國東北四百里其岡出玉

有隨和之寶

括地志云濱山一名崑山

一名斷蛇邱在隨州隨縣北二十五里說苑云昔隨侯行遇大蛇中斷疑其靈使人以藥封之蛇乃能去因號其處為斷蛇邱歲餘蛇銜明珠徑寸純白而有光因號隨珠卞和璧始皇以為傳國璽也垂明月之

珠服太阿之劍束織離之馬建翠鳳之旗樹靈鼉之鼓

此數寶者秦不生一焉而陛下說之何也必秦國之所

生然後可則是夜光之璧不飾朝廷犀象之器不為玩

好鄭衛之女不充後宮而駿良駛騁不實外廐江南金

錫不為用西蜀丹青不為采所以飾後宮充下陳娛心

意說耳目者必出於秦然後可則是宛珠之簪傳璣之珥阿縞之衣錦繡之飾不進於前而隨俗雅化佳治窈窕趙女不立於側也夫擊甕叩鈇彈箏搏髀而歌呼鳴鳴快耳目者真秦之聲也鄭衛桑間昭虞武象者異國之樂也今棄擊甕叩鈇而就鄭衛退彈箏而取昭虞若是者何也快意當前適觀而已矣今取人則不然不問可否不論曲直非秦者去為客者逐然則是所重者在乎色樂珠玉而所輕者在乎人民也此非所以跨海內



制諸侯之術也臣聞地廣者粟多國大者人衆兵彊則  
士勇是以太山不讓土壤故能成其大河海不擇細流  
故能就其深王者不却衆庶故能明其德是以地無四  
方民無異國四時充美鬼神降福此五帝三王之所以  
無敵也今乃棄黔首以資敵國却賓客以業諸侯使天  
下之士退而不敢西向裏足不入秦此所謂藉寇兵而  
齎盜糧者也夫物不產於秦可寶者多士不產於秦而  
願忠者衆今逐客以資敵國損民以益讎內自虛而外

樹怨於諸侯求國無危不可得也秦王乃除逐客之令復李斯官卒用其計謀官至廷尉二十餘年竟并天下尊主為皇帝以斯為丞相夷郡縣城銷其兵刃示不復用使秦無尺土之封不立子弟為王功臣為諸侯者使後無戰攻之患始皇三十四年置酒咸陽宮博士僕射周青臣等頌稱始皇威德齊人淳于越進諫曰臣聞之殷周之王千餘歲封子弟功臣自為支輔今陛下有海內而子弟為匹夫卒有田常六卿之患臣無輔弼何以

相救哉事不師古而能長久者非所聞也今臣青等又面諛以重陛下過非忠臣也始皇下其議丞相謬其說絀其辭乃上書曰古者天下散亂莫能相一是以諸侯並作語皆道古以害今飾虛言以亂實人善其所私學以非上所建立今陛下并有天下辨白黑而定一尊而私學乃相與非法教之制聞令下即各以其私學議之入則心非出則卷議非主以為名異趣以為高率羣下以造謗如此不禁則主勢降乎上黨與成乎下禁之便

臣諸諸有文學詩書百家語者蠲除去之令到滿三十日弗去黥為城旦所不去者醫藥卜筮種樹之書若有欲學者以吏為師始皇可其議收去詩書百家之語以愚百姓使天下無以古非今明法度定律令皆以始皇起同文書

六國制令不同今令同之

治離宮別館周偏天下明年又

巡狩外攘四夷斯皆有力焉斯長男由為三川守諸男皆尚秦公主女悉嫁秦諸公子三川守李由告歸咸陽李斯置酒於家百官長皆前為壽門廷車騎以千數李

斯喟然而歎曰嗟乎吾聞之荀卿曰物禁太盛夫斯乃  
上蔡布衣閭巷之黔首上不知其駕下遂擢至此當今  
人臣之位無居臣上者可謂富貴極矣物極則衰吾未  
知所稅駕也始皇三十七年十月行出游會稽並海上

北抵琅邪

今沂州

丞相斯中車府令趙高兼行符璽令事

皆從始王有二十餘子長子扶蘇以數直諫上上使監

兵上郡

上郡故城在綏州上縣東南五十里

蒙恬為將少子胡亥愛請從

上許之餘子莫從其年七月始皇帝至沙丘

沙丘臺在邢州病

甚令趙高為書賜公子扶蘇曰以兵屬蒙恬與喪會咸陽而葬書已封未授使者始皇崩書及璽皆在趙高所獨子胡亥丞相李斯趙高及幸宦者五六人知始皇崩餘羣臣皆莫知也李斯以為上在外崩無真太子故祕之置始皇居輜輳車中百官奏事上食如故宦者輒從輜輳車中可諸奏事趙高因留所賜扶蘇璽書而謂公子胡亥曰上崩無詔封王諸子而獨賜長子書長子至即立為皇帝而子無尺寸之地為之奈何也胡亥曰固

吾聞之明君知臣明父知子父捐命不封諸子何可言  
者趙高曰不然方今天下之權存亡在子與高及丞相  
耳願子圖之且夫臣人與見臣於人制人與見制於人  
豈可同日道哉胡亥曰廢兄而立弟是不義也不奉父  
詔而畏死是不孝也能薄而材譎彊因人之功是不能  
也三者逆德天下不服身殆傾危社稷不血食高曰臣  
聞湯武殺其主天下稱義焉不為不忠衛君殺其父而  
衛國載其德孔子著之不為不孝夫大行不小謹盛德

不辭讓鄉曲各有宜而百官不同功胡顧小而忘大後  
必有害狐疑猶豫後必有悔斷而敢行鬼神避之後有  
成功願子遂之胡亥喟然歎曰今大行未發喪禮未終  
豈宜以此事干丞相哉趙高曰時乎時乎間不及謀羸  
糧躍馬唯恐後時胡亥既然高之言高曰不與丞相謀  
恐事不能成臣請為子與丞相謀之高乃謂丞相斯曰  
上崩賜長子書與喪會咸陽而立為嗣書未行今崩  
未有知者也所賜長子書及符璽皆在胡亥所定太子



在君侯與高之口耳事將何如斯曰安得亡國之言此  
非人臣所當議也高曰君侯自料能孰與蒙恬功高孰  
與蒙恬謀遠不失孰與蒙恬無怨於天下孰與蒙恬長  
子舊而信之孰與蒙恬斯曰此五者皆不及蒙恬而君  
責之何深也高曰高因內官之厠役也幸得以刀筆之  
文進入秦宮管事二十餘年未嘗見秦免罷丞相功臣  
有封及二世者也卒皆以誅亡皇帝二十餘子皆君之  
所知長子剛毅而武勇信人而奮士即位必用蒙恬為

丞相君侯終不懷通侯之印歸於鄉里明矣高受詔教  
習胡亥使學以法事數年矣未嘗見過失慈仁篤厚輕  
財重士辯於心而詘於口盡禮敬士秦之諸子未有及  
此者可以為嗣君計而定之斯曰君其反位斯奉主之  
詔聽天之命何慮之可定也高曰安可危也危可安也  
安危不定何以貴聖斯曰斯上蔡閭巷布衣也上幸擢  
為丞相封為通侯子孫皆至尊位重祿者故將以存亡  
安危屬臣也豈可負哉夫忠臣不避死而庶幾孝子不

勤勞而見危人臣各守其職而已矣君其勿復言將令  
斯德罪高曰蓋聞聖人遷徙無常就變而從時見末而  
知本觀指而覩歸物固有之安得常法哉方今天下之  
權命懸於胡亥高能得志焉且夫從外制中謂之惑從  
下制上謂之賊故秋霜降者草花落水搖動者萬物作  
此必然之效也君何見之晚斯曰吾聞晉易太子謂廢  
立奚三世不安齊桓兄弟爭位謂小白與身死為戮紂  
齊也殺親戚謂殺比干不聽諫者國為邱墟遂危社稷三者

囚箕子

逆天宗廟不血食斯其猶人哉安足為謀高曰上下合同可以長久中外若一事無表裏君聽臣之計即長有封侯世世稱孤必有喬松之壽孔墨之智今釋此而不從禍及子孫足以為寒心善者因禍為福君何處焉斯乃仰天而歎垂淚太息曰嗟乎獨遭亂世既以不能死安託命哉於是斯乃聽高高乃報胡亥曰臣請奉太子之明命以報丞相丞相斯敢不奉令於是乃相與謀詐為受始皇詔丞相立子胡亥為太子更為書賜長子扶

蘇曰朕巡天下禱祠名山諸神以延壽命今扶蘇與將軍蒙恬將師數十萬以屯邊十有餘年矣不能進而前士卒多耗無尺寸之功乃反數上書直言誹謗我所為以不得罷歸為太子日夜怨望扶蘇為人子不孝其賜劔以自裁將軍恬與扶蘇居外不匡正宜知其謀為人臣不忠其賜死以兵屬裨將王離封其書以皇帝璽遣胡亥客奉書賜扶蘇於上郡使者至發書扶蘇泣入內舍欲自殺蒙恬止扶蘇曰陛下居外未立太子使臣將

三十萬衆守邊公子為監此天下重任也今一使者來  
即自殺安知其非詐請復請而後死未暮也使  
數趣之扶蘇為人仁謂蒙恬曰父而賜子死尚安復請  
即自殺蒙恬不肯死使者即以屬吏繫於陽周

陽周寧  
州羅川

縣之  
邑也

使者還報胡亥斯高大喜至咸陽發喪太子立為

二世皇帝以趙高為郎中令常侍中用事二世燕居乃  
召高與謀事謂曰夫人生居世間也譬猶騁六驥過決  
隙也吾既已臨天下矣欲悉耳目之所好窮心志之所

樂以安宗廟而樂萬姓長有天下終吾年壽其道可乎  
高曰此賢主之所能行也而昏亂主之所禁也臣請言  
之不敢避斧鉞之誅願陛下少留意焉夫沙丘之謀諸  
公子及大臣皆疑焉而諸公子盡帝兄大臣又先帝之  
所置也今陛下初立此其屬意怏怏皆不服恐為變且  
蒙恬已死蒙毅將兵居外臣戰戰栗栗唯恐不終且陛  
下安得為此樂乎二世曰為之奈何趙高曰嚴法而刻  
刑令有罪者相坐誅至收族滅大臣而遠骨肉貧者富

之賤者貴之盡除去先帝之故臣更置陛下之所親信者近之此則陰德歸陛下害除而姦謀塞羣臣莫不被潤澤蒙厚德陛下則高枕肆志寵樂矣計莫出於此二世然高之言乃更為法律於是羣臣諸公子有罪輒下高令鞠治之殺大臣蒙毅等公子十二人僇死咸陽市十公主斃死於杜

斃音貯格反

財物入於縣官相連坐者不

可勝數公子高欲奔恐收族乃上書曰先帝無恙時臣入則賜食出則乘輿御府之衣臣得賜之中廐之寶馬



臣得賜之臣當從死而不能為人子不孝為人臣不忠  
不忠者無名以立於世臣請從死願葬鄜山之足唯上  
幸哀憐之書上胡亥大說召趙高而示之曰此可謂急  
乎趙高曰人臣當憂死而不暇何變之得謀胡亥可其  
書賜錢十萬以葬法令誅罰日益刻深羣臣人人自危  
欲畔者衆又作阿房之宮治直馳道賦歛愈重戍徭無  
已於是楚戍卒陳勝吳廣等乃作亂起於山東傑俊相  
立自置為侯王叛秦兵至鴻門而却李斯數欲請間諫

二世不許而二世責問李斯曰吾有私議而有所聞於韓子也曰堯之有天下也堂高三尺采椽不斷茅茨不翦雖逆旅之宿不勤於此矣冬日鹿裘夏日葛衣粢糲之食藜藿之羹飯土甌啜土銅雖監門之養不蔽於此矣禹鑿龍門通大夏疏九河曲九防

謂河之九曲別為提防

決渟

水致之海而股無肢脛無毛手足胼胝面目黎黑遂以死於外葬於會稽臣虜之勞不烈於此矣然則夫所貴於有天下者豈欲苦形勞神身處逆旅之宿口食監門

之養手持臣虜之作哉此不肖人之所勉也非賢者之所務也彼賢人之有天下也專用天下適已而已矣此所以貴於有天下也夫所謂賢人者必能安天下而治萬民今身且不能利將惡能治天下哉故吾願肆志廣欲長享天下而無害為之奈何李斯子由為三川守羣盜吳廣等西略地過去弗能禁章邯以破逐廣等兵使者覆案三川相屬誚讓斯居三公位如何今盜如此李斯恐懼重爵祿不知所出乃阿二世意欲求容以書對

曰夫賢主者必且能全道而行督責之術者也督責之則臣不敢不竭能以徇其主矣此臣主之分定上下之義明則天下賢不肖莫敢不盡力竭任以徇其君矣是故主獨制於天下而無所制也能窮樂之極矣賢明之主也可不察焉故申子曰有天下而不恣睢命之曰以天下為桎梏者

言有天下不能自縱恣督責乃勞身於天下若堯禹即以天下為桎梏於身也

無他焉不能督責而顧以其身勞於天下之民若堯禹然故謂之桎梏也夫不能修申韓之明術行督責之道

專以天下自適也而徒務苦形勞神以身徇百姓則是  
黔首之役非畜天下者也何足貴哉夫以人徇己則己  
貴而人賤以己徇人則己賤而人貴故徇人者賤而人  
所徇者貴自古及今未有不然者也凡古之所為尊賢  
者為其貴也而所為惡不肖者為其賤也而堯禹以身  
徇天下者也因隨而尊之則亦失所為尊賢之心矣夫  
可謂大繆矣謂之為桎不亦宜乎不能督責之過也故  
韓子曰慈母有敗子而嚴家無格虜者何也則能罰之

加焉必也故商君之法刑棄灰於道者

棄灰於道者黜也韓子云殷之

法棄灰於衢者刑子貢以為重問之仲尼曰灰棄於衢必燔人必怒怒則闔閭則三族雖刑之可也

夫棄

灰薄罪也而被刑重罰也彼唯明主為能深督輕罪夫

罪輕且督深而況有重罪乎故民不敢犯也是故韓子

曰布帛尋常庸人不釋鑠金百鎰盜跖不搏者非庸人

之心重尋常之利深而盜跖之欲淺也人不以盜跖之

行為輕百鎰之重也搏必隨手刑則盜跖不搏百鎰而

罰不必行也則庸人不釋尋常是故城高五丈而樓季

不輕犯也山之高百仞而跛狎牧其上夫樓季也而難五丈之限豈跛狎也而易百仞之高哉隋塹之勢異也明主聖王之所以能久處尊位長執重勢而獨擅天下之利者非有異道也能獨斷而審督責必深罰故天下不敢犯也今不務所以不犯而事慈母之所以敗子也則亦不察於聖人之論矣夫不能行聖人之術則舍為天下役何事哉可不哀邪且夫儉節仁義之人立於朝則荒肆之樂輟矣諫說論理之臣開於側則流漫之

志誠矣烈士死節之行顯於世則淫康之虞廢矣故明  
主能外此三者而獨操主術以制聽從之臣而修其明  
法故身尊而勢重也凡賢主者必將能拂世摩俗而廢  
其所惡立其所欲故生則有尊重之勢死則有賢明之  
謚也是以明君獨斷故權不在臣也然後能滅仁義之  
塗掩馳說之口困烈士之行塞聰揜明內獨視聽故外  
不可傾以仁義烈士之行而內不可奪以諫說忿爭之  
辯故能犖然獨行恣睢之心而莫之敢逆若此然後可



謂能明申韓之術而修商君之法法修術明而天下亂者未之聞也故曰王道約而易操也唯明主為能行之若此則謂督責之誠則臣無邪臣無邪則天下安天下安則主嚴尊主嚴尊則督責必督責必則所求得所求得則國家富國家富則君樂豐故督責之術設則所欲無不得矣羣臣百姓救過不給何變之敢圖若此則帝道備而可謂能明君臣之術矣雖申韓復生不能加也書奏二世悅於是行督責益嚴稅民深者為明吏二世

曰若此則可謂能督責矣刑者相半於道而死人日成積於市殺人衆者為忠臣二世曰若此則可謂能督責矣初趙高為郎中令所殺及報私怨衆多恐大臣入朝奏事毀惡之乃說二世曰天子所以貴者但以聞聲羣臣莫得見其面故號曰朕且陛下富於春秋未必盡通諸事今坐朝廷譴舉有不當者則見短於大臣非所以示神明於天下也且陛下深拱禁中與臣及侍中習法者待事事來有以揆之如此則大臣不敢奏疑事天下

稱聖主矣二世用其計乃不坐朝廷見大臣居禁中趙高常侍中用事事皆決於趙高高聞李斯以為言乃見丞相曰闕東羣盜多今上急發繇治阿房宮聚狗馬無用之物臣欲諫為位賤此真君侯之事君何不諫李斯曰固也吾欲言之久矣今時上不坐朝廷上居深宮吾有所言者不可傳也欲見無間趙高謂曰君誠能諫請為君侯上間語君於是趙高侍二世方燕樂婦女居前使人告丞相上方間可奏事丞相至宮門上謁如此者

三二世怒曰吾常多間日丞相不來吾方燕私丞相輒來請事丞相豈少我哉且固我哉趙高因曰如此殆矣夫沙丘之謀丞相與焉今陛下已立為帝而丞相貴不益此其意亦望裂地而王矣且陛下不問臣臣不敢言丞相長男李由為三川守楚盜陳勝等皆丞相傍縣之子以故楚盜公行過三川城守不肯擊高問其文書相往來未得其審故未敢以聞且丞相居外權重於陛下二世以為然欲案丞相恐其不審乃使人案驗三川守

與盜通狀李斯聞之是時二世在甘泉方作觥抵優俳  
之觀李斯不得見因上書言趙高之短曰臣聞之臣疑  
其君無不危國妄疑其夫無不危家今有大臣於陛下  
擅利擅害與陛下無異此甚不便昔者司城子罕相宋  
身行刑罰以威行之期年遂劫其君田常為簡公臣爵  
列無敵於國私家之富與公家均布惠施德下得百姓  
上得羣臣陰取齊國殺宰予於庭即弒簡公於朝遂有  
齊國此天下所明知也今高有邪佚之志危反之行如

子罕相宋也私家之富若田氏之於齊也兼行田常子罕之逆道而劫陛下之威信其志若韓玘為韓安相也陛下不圖臣恐其為變也二世曰何哉夫高故宦人也然不為安肆志不以危易心潔行脩善自使至此以忠得進以信守位朕實賢之而君疑之何也且朕少失先人無所識知不習治民而君又老恐與天下絕矣朕非屬趙君當誰任哉且趙君為人精廉彊力下知人情上能適朕君其勿疑李斯曰不然夫高故賤人也無識於

理貪欲無厭求利不止列勢次主求欲無窮臣故曰殆  
二世已前信趙高恐李斯殺之乃私告趙高高曰丞相  
所患者獨高高已死丞相即欲為田常所為於是二世  
曰其以李斯屬郎中令趙高案治李斯李斯拘執束縛  
居圜圜中仰天而歎曰嗟乎悲夫不道之君何可為計  
哉昔者桀殺閼龍逢紂殺王子比干吳王夫差殺伍子  
胥此三臣者豈不忠哉然而不免於死身死而所忠者  
非也今吾智不及三子而二世之無道過於桀紂夫差

吾以忠死宜矣且二世之治豈不亂哉日者夷其兄弟而自立也殺忠臣而貴賤人作為阿房之宮賦歛天下吾非不諫也而不吾聽也凡古聖王飲食有節車器有數宮室有度出令造事加費而無益於民利者禁故能長久治安今行逆於昆弟不顧其咎侵殺忠臣不思其殃大為宮室厚賦天下不受其費三者已行天下不聽今反者已有天下之半矣而心尚未寤也而以趙高為佐吾必見寇至咸陽麋鹿游於朝也於是二世乃使高



案丞相獄治罪責斯與子由謀反狀皆收捕宗族賓客  
趙高治斯榜掠千餘不勝痛自誣服斯所以不死者自  
負其辯有功實無反心幸得上書自陳幸二世之寤而  
赦之李斯乃從獄中上書曰臣為丞相治民三十餘年  
矣逮秦地之狹隘先王之時秦地不過千里兵數十萬  
臣盡薄材謹奉法令陰行謀臣資之金玉使游說諸侯  
陰脩甲兵飾政教官鬪士尊功臣盛其爵祿故終以脅  
韓弱魏破燕趙夷齊楚卒兼六國虜其王立秦為天子

罪一矣地非不廣又北逐胡貉南定百越以見秦之彊  
罪二矣尊大臣盛其爵位以固其親罪三矣立社稷脩  
宗廟以明主之賢罪四矣更尅畫平斗斛度量文章布  
之天下以樹秦之名罪五矣治馳道興游觀以見主之  
得意罪六矣緩刑罰薄賦歛以遂主得衆之心萬民戴  
王死而不忘罪七矣若斯之為臣者罪足以死固久矣  
上幸盡其能力乃得至今願陛下察之書上趙高使吏  
棄去不奏白因安得上書趙高使其客十餘輩詐為御

史謁者侍中更往覆訊斯斯更以其實對輒使人復榜之後二世使人驗斯斯以為如前終不敢更言辭服奏當上二世喜曰微趙君幾為丞相所賣及二世所使索三川之守至則項梁已擊殺之使者來會丞相下吏趙高皆妄為反辭二世二年七月具斯五刑論腰斬咸陽市斯出獄與其中子俱執顧謂其中子曰吾欲與若復牽黃犬俱出上蔡東門逐狡兔豈可得乎遂父子相哭而夷三族李斯已死二世拜趙高為中丞相事無大小

輒決於高高自知權重乃獻鹿謂之馬二世問左右此  
乃鹿也左右皆曰馬也二世驚自以為惑乃召太卜令  
卦之太卜曰陛下春秋郊祀奉宗廟鬼神齋戒不明故  
至於此可依盛德而明齋戒於是乃入上林齋戒日游  
弋獵有行人入上林中二世自射殺之趙高教其女壻  
咸陽令閭樂劾不知何人賊殺人移上林高乃諫二世  
曰天子無故賊殺不辜人此上帝之禁也鬼神不享天  
且降殃當遠避宮以禳之二世乃出居望夷之宮留三

日趙高詐詔衛士令士皆素服持兵內鄉入告二世曰  
山東羣盜兵大至二世上觀而見之恐懼高即因劫令  
自殺引璽而佩之左右百官莫從上殿殿欲壞者三高  
自知天弗與羣臣弗許乃召始皇弟授之璽子嬰即位  
患之乃稱疾不聽事與宦者韓談及其子謀殺高高上  
謁請病因召入令韓談刺殺之夷其三族子嬰立三月  
沛公兵從武關入至咸陽羣臣百官皆畔不適子嬰與  
妻子自係其頸以組降軹道旁

軹道在萬年縣  
東北十六里

沛公因

以屬吏項王至而斬之遂以亡天下

太史公曰李斯以閭閻歷諸侯入事秦因以瑕釁以輔  
始皇卒成帝業斯為三公可謂尊用矣斯知六藝之歸  
不務明政以補主上之缺持爵祿之重阿順苟合嚴威  
酷刑聽高邪說廢適立庶諸侯已畔斯乃欲諫爭不亦  
末乎人皆以斯極忠而被五刑死察其本乃與俗議之  
異不然斯之功且與周勃列矣

史記正義卷八十七

欽定四庫全書

史記正義卷八十八

唐 張守節 撰

蒙恬列傳第二十八

史記八十八

蒙恬者其先齊人也恬大父蒙驁自齊事秦昭王官至上卿秦莊襄王元年蒙驁為秦將伐韓取城皐滎陽作置三川郡二年蒙驁攻趙取三十七城始皇三年蒙驁攻韓取十三城五年蒙驁攻魏取二十城作置東郡始皇七

年蒙騫卒騫子曰武武子曰怙怙嘗書獄典文學始皇  
二十三年蒙武為秦裨將軍與王翦攻楚大破之殺項  
燕二十四年蒙武攻楚虜楚王蒙恬弟毅始皇二十六  
年蒙恬因家世得為秦將攻齊大破之拜為內史秦已  
并天下乃使蒙恬將三十萬衆北逐戎狄收河南謂靈  
及勝  
等州築長城因地形用制險塞起臨洮至遼東遼東郡在  
遼水東始  
皇築長城東至遼  
水西南至海之上延袤萬餘里於是渡河據陽山遶蛇而  
北暴師於外十餘年居上郡是時蒙恬威振匈奴始皇



甚尊寵蒙氏信任賢之而親近蒙毅位至上卿出則參  
乘入則御前恬任外事而毅常為內謀名為忠信故雖  
諸將相莫敢與之爭焉趙高者諸趙疏遠屬也趙高昆  
弟數人皆生隱宮其母被刑僇世世卑賤秦王聞高彊  
力通於獄法舉以為中車府令高即私事公子胡亥喻  
之決獄高有大罪秦王令蒙毅法治之毅不敢阿法當  
高罪死除其官籍帝以高之敦於事也赦之復其官爵  
始皇欲游天下道九原

九原郡今勝州連谷縣是

直抵甘泉

宮在雍州

使蒙恬通道自九原抵甘泉壅山堙谷千八百里道未  
就始皇三十七年冬行出游會稽並海上北走琅邪道  
病使蒙毅還禱山川未及始皇至沙丘崩秘之羣臣莫知  
是時丞相李斯少子胡亥中車府令趙高常從高雅得  
幸於胡亥欲立之又怨蒙毅法治之而不為已也因有  
賊心乃與丞相李斯公子胡亥陰謀立胡亥為太子太  
子已立遣使者以罪賜公子扶蘇蒙恬死扶蘇已死蒙  
恬疑而復請之使者以蒙恬屬吏更置胡亥以李斯舍

人為護軍使者還報胡亥已聞扶蘇死即欲釋蒙恬趙  
高恐蒙氏復貴而事怨之毅還至趙高因為胡亥忠計  
欲以滅蒙氏乃言曰臣聞先帝欲舉賢立太子久矣而  
毅諫曰不可若知賢而愈不立則是不忠而惑主也以  
臣愚意不若誅之胡亥聽而繫蒙毅於代今代州也因  
禱山川至代  
而繫前已囚蒙恬於陽周喪至咸陽已葬太子立為二  
世皇帝而趙高親近日夜毀惡蒙氏求其罪過舉劾之  
子嬰進諫曰臣聞故趙王遷殺其良臣李牧而用顏聚

燕王喜陰用荊軻之謀而倍秦之約齊王建殺其故世忠臣而用后勝之議此三君者皆各以變古者失其國而殃及其身今蒙氏秦之大臣謀士也而主欲一旦棄去之臣竊以為不可臣聞輕慮者不可以治國獨智者不可以存君誅殺忠臣而立無節行之人是內使羣臣不相信而外使鬪士之意離也臣竊以為不可胡亥不聽而遣御史曲宮乘傳之代令蒙毅曰先主欲立太子而卿難之今丞相以卿為不忠罪及其宗朕不忍乃賜

卿死亦甚幸矣卿其圖之毅對曰以臣不能得先主之意則臣少官順幸沒世可謂知意矣以臣不知太子之能則太子獨從周旋天下去諸公子絕遠臣無所疑矣夫先主之舉用太子數年之積也臣乃何言之敢諫何慮之敢謀非敢飾辭以避死也為羞累先主之名願大夫為慮焉使臣得死情實且夫順成全者道之所貴也刑殺者道之所卒也昔者秦穆公殺三良而死罪百里奚而非其罪也故立號曰繆昭襄王殺武安君白起楚

平王殺伍奢吳王夫差殺伍子胥此四君者皆為大失  
而天下非之以其君為不明以是籍於諸侯故曰用道  
治者不殺無罪而罰不加於無辜唯大夫留心使者知  
胡亥之意不聽蒙毅之言殺之二世又遣使者之陽周  
令蒙恬曰君之過多矣而卿弟毅有大罪法及內史恬  
曰自吾先人及至子孫積功信於秦三世矣今臣將兵  
三十餘萬身雖囚繫其勢足以倍畔自知必死而守義  
者不敢辱先人之教以不忘先主也昔周成王初立未

離襁緜周公旦負王以朝卒定天下及成王有病甚殆  
公且自揃其爪以沈於河曰王未有識是旦執事有罪  
殃旦受其不祥乃書而藏之記府可謂信矣及王能治  
國有賊臣言周公旦欲為亂久矣王若不備必有大事  
王乃大怒周公旦走而奔於楚成王觀於記府得周公  
旦沈書乃流涕曰孰謂周公旦欲為亂乎殺言之者而  
反周公旦故周書曰必參而伍之今恬之宗世無二心  
而事卒如此是必孽臣逆亂內陵之道也夫成王失而

復振則卒昌桀殺闕龍逢紂殺王子比干而不悔身死  
則國亡臣故曰過可振而諫可覺也察於參伍上聖之  
法也凡臣之言非以求免於咎也將以諫而死願陛下  
為萬民思從道也使著者曰臣受詔行法於將軍不敢以  
將軍言聞於上也蒙恬喟然太息曰我何罪於天無過  
而死乎良久徐曰恬罪固當死矣起臨洮屬之遼東城  
塹萬餘里此其中不能無絕地脈哉此乃恬之罪也乃  
吞藥自殺



太史公曰吾適北邊自直道歸行觀蒙恬為秦築長城  
亭障塹山堙谷通直道固輕百姓力矣夫秦之初滅諸  
侯天下之心未定疲傷者未瘳而恬為名將不以此時  
彊諫振百姓之急養老存孤務修衆庶之和而阿意興  
功此其兄弟遇誅不亦宜乎何乃罪地脈哉

史記正義卷八十八

欽定四庫全書

史記正義卷八十九

唐 張守節 撰

張耳陳餘列傳第二十九

史記八十九

張耳者大梁人也其少時及魏公子毋忌為客張耳嘗亡命游外黃外黃富人女甚美嫁庸奴亡其夫去抵父客父客素知張耳乃謂女曰必欲求賢夫從張耳女聽乃卒為請決嫁之張耳張耳是時脫身游女家厚奉給

張耳張耳以故致千里客乃官魏為外黃令名由此益賢

陳餘者亦大梁人也好儒術數游趙苦陘

音邢邢州唐昌縣

富

人公乘氏以其女妻之亦知陳餘非庸人也餘年少父事張耳兩人相與為刎頸交秦之滅大梁也張耳家外黃高祖為布衣時嘗數從張耳游客數月秦滅魏數歲已聞此兩人魏之名士也購求有得張耳千金陳餘五百金張耳陳餘乃變名姓俱之陳為里監門以自食兩

人相對里吏嘗有過笞陳餘陳餘欲起張耳躡之使受笞吏去張耳乃引陳餘之桑下而數之曰始吾與公言何如今見小辱而欲死一吏乎陳餘然之秦詔書購求兩人兩人亦反用門者以令里中陳涉起蕞至入陳兵數萬張耳陳餘上謁陳涉涉及左右生平數聞張耳陳餘賢未嘗見見即大喜陳中豪傑父老乃說陳涉曰將軍身被堅執銳率士卒以誅暴秦復立楚社稷存亡繼絕功德宜為王且夫監臨天下諸將不為王不可願將

軍立為楚王也陳涉問此兩人兩人對曰夫秦為無道  
破人國家滅人社稷絕人後世罷百姓之力盡百姓之  
財將軍瞋目張膽出萬死不顧一生之計為天下除殘  
也今始至陳而王之示天下私願將軍毋王急引兵而  
西遣人立六國後自為樹黨為秦益敵也敵多則力分  
與衆則兵彊如此野無交兵縣無守城誅暴秦據咸陽  
以令諸侯諸侯亡而得立以德服之如此則帝業成矣  
今獨王陳恐天下解也

解紀賈反言天下諸侯見陳勝  
稱王王陳皆解墮不相從也

陳涉不聽遂立為王陳餘乃復說陳王曰大王舉梁楚而西務在入關未及收河北也臣嘗游趙知其豪桀及地形願請奇兵北略趙地於是陳王以故所善陳人武臣為將軍邵騷為護軍以張耳陳餘為左右校尉予卒三千人北略趙地武臣等從白馬渡河至諸縣說其豪桀曰秦為亂政虐刑以殘賊天下數十年矣北有長城之域南有五嶺之戍外內騷動百姓罷敝頭會箕歛以供軍費財匱力盡民不聊生重之以苛法峻刑使天下

父子不相安陳王奮臂為天下倡始王楚之地方二千  
里莫不響應家自為怒人自為鬪各報其怨而攻其讎  
縣殺其令丞郡殺其守尉今已張大楚王陳使吳廣周  
章將卒百萬西擊秦於此時而不成封侯之業者非人  
豪也諸君試相與計之夫天下同心而苦秦久矣因天  
下之力而攻無道之君報父兄之怨而成割地有土之  
業此士之一時也豪傑皆然其言乃行收兵得數萬人  
號武臣為武信君下趙十城餘皆城守莫肯下乃引兵



東北擊范陽范陽人蒯通說范陽令曰竊聞公之將死  
故弔雖然賀公得通而生范陽令曰何以弔之對曰秦  
法重足下為范陽令十年矣殺人之父孤人之子斷人  
之足黥人之首不可勝數然而慈父孝子莫敢傷刃公  
之腹中者畏秦法耳今天下大亂秦法不施然則慈父  
孝子且傷刃公之腹中以成其名此臣之所以弔公也  
今諸侯畔秦矣武信君兵且至而君堅守范陽少年皆  
爭殺君下武信君君急遣臣見武信君可轉禍為福在

今矣范陽令乃使蒯通見武信君曰足下必將戰勝然後略地攻得然後下城臣竊以為過矣誠聽臣之計可不攻而降城不戰而略地傳檄而千里定可乎武信君曰何謂也蒯通曰今范陽令宜整頓其士卒以守戰者也怯而畏死貪而重富貴故欲先天下降畏君以為秦所置吏誅殺如前十城也然今范陽少年亦方殺其令自以城距君君何不齎臣侯印拜范陽令范陽令則以城下君少年亦不敢殺其令今范陽令乘朱輪華轂使

驅馳燕趙郊燕趙郊見之皆曰此范陽令先下者也即  
喜矣燕趙城可毋戰而降也此臣之所謂傳檄而千里  
定者也武信君從其計因使蒯通賜范陽令侯印趙地  
聞之不戰以城下者三十餘城至邯鄲張耳陳餘聞周  
章軍入關至戲却

戲音義  
出驪山

又聞諸將為陳王徇地多以

讒毀得罪誅怨陳王不用其策不以為將而以為校尉  
乃說武臣曰陳王起蕲至陳而王非必立六國後將軍  
今以三千人下趙數十城獨介居河北不王無以填之

且陳王聽讒還報恐不脫於禍又不如立其兄弟不即立趙後將軍毋失時時間不容息武臣乃聽之遂立為趙王以陳餘為大將軍張耳為右丞相邵騭為左丞相使人報陳王陳王大怒欲盡族武臣等家而發兵擊趙陳王相國房君諫曰秦未亡而誅武臣等家此又生一秦也不如因而賀之使急引兵西擊秦陳王然之從其計徙繫武臣等家宮中封張耳子敖為成都君陳王使使者賀趙令趣發兵西入關張耳陳餘說武臣曰王王趙

非楚意特以計賀王楚已滅秦必加兵於趙願王毋西  
兵北徇燕代南收河內以自廣趙南據大河北有燕代  
楚雖勝秦必不敢制趙趙王以為然因不西兵而使韓  
廣略燕李良略常山張騫略上黨韓廣至燕燕人因立  
廣為燕王趙王乃與張耳陳餘止略地燕界趙王間出  
為燕軍所得燕將囚之欲與分趙地半乃歸王使者往  
燕輒殺之以求地張耳陳餘患之有廝養卒謝其舍中  
曰吾為公說燕與趙王載歸舍中皆笑曰使者往十餘

輒死若何以能得王乃走燕壁燕將見之問燕將曰  
知臣何欲燕將曰若欲得趙王耳曰君知張耳陳餘何  
如人也燕將曰賢人也曰知其志何欲曰欲得其王耳  
趙養卒乃笑曰君未知此兩人所欲也夫武臣張耳陳  
餘杖馬箠下趙數十城此亦各欲南面而王豈欲為卿  
相終已邪夫臣與主豈可同日而道哉顧其勢初定未  
敢參分而王且以少長先立武臣為王以持趙心今趙  
地已服此兩人亦欲分趙而王時未可耳今君乃囚趙

王此兩人名為求趙王實欲燕殺之此兩人分趙自立  
夫以一趙尚易燕況以兩賢王左提右挈而責殺王之  
罪滅燕易矣燕將以為然乃歸趙王養卒為御而歸李  
良已定常山還報趙王復使良略太原至石邑秦兵  
塞井陘未能前秦將詐稱二世使人遺李良書不封曰  
良嘗事我得顯幸良誠能反趙為秦赦良罪貴良良得書  
疑不信乃還之邯鄲益請兵未至道逢趙王姊出飲從  
百餘騎李良望見以為王伏謁道旁王姊醉不知其

將使騎謝李良李良素貴起慙其從官從官有一人  
曰天下畔秦能者先立且趙王素出將軍下令女  
兒乃不為將軍下車請追殺之李良已得秦書固欲  
反趙未決因此怒遣人追殺王姊道中乃遂將其兵襲  
邯鄲邯鄲不知竟殺武臣邵騷趙人多為張耳陳餘耳  
目者以故得脫出收其兵得數萬人客有說張耳曰兩  
君羈旅而欲附趙難獨立立趙後扶以義可就功乃求得  
趙歇立為趙王居信都李良進兵擊陳餘陳餘敗李良



李良走歸章邯章邯引兵至邯鄲皆徙其民河內夷其  
城郭張耳與趙王歇走入鉅鹿城王離圍之陳餘北收  
常山兵得數萬人軍鉅鹿北章邯軍鉅鹿南棘原築甬  
道屬河餉王離王離兵食多急攻鉅鹿鉅鹿城中食盡兵少  
張耳數使人召前陳餘陳餘自度兵少不敵秦不敢前  
數月張耳大怒怨陳餘使張騫陳澤音釋往讓陳餘曰始  
吾與公為刎頸交今王與耳旦暮且死而公擁兵數萬  
不肯相救安在其相為死苟必信胡不赴秦軍俱死且

有十一二相全

十中冀一  
兩勝秦

陳餘曰吾度前終不能救趙

徒盡亡軍且餘所以不俱死欲為趙王張君報秦今必  
俱死如以肉委餓虎何益張廩陳澤曰事已急要以俱  
死立信安知後慮陳餘曰吾死顧以為無益必如公言  
乃使五千人令張廩陳澤先嘗秦軍至皆沒當是燕齊  
楚聞趙急皆來救張敖亦止收代兵得萬餘人來皆壁  
餘旁未敢擊秦項羽兵數絕章邯甬道王離軍乏食項  
羽悉引兵渡河遂破章邯章邯引兵解諸侯軍乃敢擊

圍鉅鹿秦軍遂虜王離涉間自殺卒存鉅鹿者楚力也  
於是趙王歇張耳乃得出鉅鹿謝諸侯張耳與陳餘相  
見責讓陳餘以不肯救趙及問張騫陳澤所在陳餘怒  
曰張騫陳澤以必死責臣臣使將五千人先嘗秦軍皆  
沒不出張耳不信以為殺之數問陳餘陳餘怒曰不意  
君之望臣深也豈以臣為重去將哉乃脫解印綬推予  
張耳張耳亦愕不受陳餘起如廁客有說張耳曰臣聞  
天與不取反受其咎今陳將軍與君印君不受反天不

祥急取之張耳乃佩其印收其麾下而陳餘還亦望張

耳不讓

言陳餘如廁還亦怒望張耳不讓其印

遂趨出張耳遂收其兵陳

餘獨與麾下所善數百人之河上澤中漁獵由此陳餘

張耳遂有郤趙王歇復居信都張耳從項羽諸侯入關

漢元年二月項羽立諸侯王張耳雅游人多為之言項

羽亦素數聞張耳賢乃分趙立張耳為常山王治信都

信都更名襄國陳餘客多說項羽曰陳餘張耳一體有

功於趙項羽以陳餘不從入關聞其在南皮即以南皮

旁三縣以封之而徙趙王歇王代張耳之國陳餘愈益怒曰張耳與餘功等也今張耳王餘獨侯此項羽不平

及齊王田榮畔楚陳餘乃使夏說說田榮曰

上說音悅  
下音式統

反項羽為天下宰不平盡王諸將善地徙故王王惡地

今趙王乃居代願王假臣兵請以南皮為扞蔽田榮欲樹黨於趙以反楚乃遣兵從陳餘陳餘因悉三縣兵襲常山王張耳張耳敗走念諸侯無可歸者曰漢王與我有舊故而項羽又彊立我我欲之楚甘公曰漢王之入

關五星聚東井東井者秦分也先至必霸楚雖彊後必屬漢故耳走漢漢王亦還定三秦方圍章邯廢上張耳謁漢王漢王厚遇之陳餘已敗張耳皆復收趙地迎趙王於代復為趙王趙王德陳餘立以為代王陳餘為趙王弱國初定不之國留傳趙王而使夏說以相國守代漢二年東擊楚使使告趙欲與俱陳餘曰漢殺張耳乃從於是漢王求人類張耳者斬之持其頭遺陳餘陳餘乃遣兵助漢漢之敗於彭城西陳餘亦復覺張耳不死

即背漢漢三年韓信已定魏地遣張耳與韓信擊破趙

井陘斬陳餘泚水上

在趙州贊皇縣界

追殺趙王歇襄國漢立張耳

為趙王漢五年張耳薨謚為景王子敖嗣立為趙王高祖長

女魯元公主為趙王敖后漢七年高祖從平城過趙趙王朝

夕袒韞蔽自上食禮甚卑有子壻禮高祖箕倨詈甚慢

易之趙相貫高趙午等年六十餘故張耳客也生平為

氣怒曰吾王孱王也說王曰夫天下豪桀並起能者先

立今王事高祖甚恭而高祖無禮請為王殺之張敖齧

其指出血曰君何言之誤且先人亡國賴高祖得復國  
德流子孫秋豪皆高祖力也願君無復出口貫高趙午  
等十餘人皆相謂曰乃吾等非也吾王長者不倍德且  
吾等義不辱今怨高祖辱我王故欲殺之何乃滂王為  
乎今事成歸王事敗獨身坐耳漢八年上從東垣還過  
趙貫高等乃壁人柏人柏人故城在刑州柏人縣西  
北十二里即高祖宿處也要  
之置上過欲宿心動問曰縣名為何曰柏人柏人者迫  
於人也不宿而去漢九年貫高怨家知其謀乃上變告



之於是上皆并逮捕趙王貫高等十餘人皆爭自剄貫  
高獨怒罵曰誰令公為之今王實無謀而并捕王公等  
皆死誰白王不反者乃輜車膠致

謂其車上著板四周如櫃形膠密不得開

送致京師也

與王詣長安治張敖之罪上乃詔趙羣臣賓客

有敢從王皆族貫高與客孟舒等十餘人皆自髡鉗為  
王家奴從來貫高至對獄曰獨吾屬為之王實不知吏  
治榜笞數千剄身無可擊者終不復言呂后數言張王  
以魯元公主故不宜有此上怒曰使張敖據天下豈少

而女乎不聽廷尉以貫高事辭聞上曰壯士誰知者以私問之中大夫泄公曰

泄姓也史有泄私

臣之邑子素知之此

固趙國立名義不侵為然諾者也上使泄公持節問之  
復輿前仰視曰泄公邪泄公勞苦如生平驪與語問張  
王果有計謀不高曰人情寧不各愛其父母妻子乎今  
吾三族皆以論死豈以王易吾親哉顧為王實不反獨  
吾等為之具道本指所以為者王不知狀於是泄公入  
具以報上乃赦趙王上賢貫高為人能立然諾使泄公

具告之曰張王已出因赦貫高貫高喜曰吾王審出乎  
泄公曰然泄公曰上多足下故赦足下貫高曰所以不  
死一身無餘者白張王不反也今王已出吾責已塞死  
不恨矣且人臣有篡殺之名何面目復事上哉縱上不  
殺我我不愧於心乎乃仰絕肮遂死當此之時名聞天  
下張敖已出以尚魯元故封為宣平侯於是上賢張王  
諸客以鉗奴從張王入關無不為諸侯相郡守者及孝  
惠魯后文帝孝景時張王客子孫皆得為二千石張敖

高后六年薨

魯元公主墓在咸陽縣西北二十五里次東有張敖冢與公主同域又張耳墓在咸

陽縣東三十里

子偃為魯元王以母呂后女故呂后封為魯

元王元王弱兄弟少乃封張敖他姬子二人壽為樂昌侯侈為信都侯高后崩諸呂無道大臣誅之而廢魯元王及樂昌侯信都侯孝文帝即位復封故魯元王偃為南宮侯續張氏

太史公曰張耳陳餘世傳所稱賢者其賓客廝役莫非天下俊桀所居國無不取卿相者然張耳陳餘始居約

時相然信以死豈顧問哉及據國爭權卒相滅亡何鄉  
者相慕用之誠後相倍之戾也豈非以利哉名譽雖高  
賓客雖盛所由殆與太伯延陵季子異矣



史記正義卷八十九